


[www.BibleForChildren.org](http://www.BibleForChildren.org)

# Genesis 1



Handih lappuna ya  
lintun Apu Dios di  
kabunyan ya luta.



Mu maid ni-an di napkol an  
umat tuh luta ya maid di niha-ad  
hidi te adallom an danum ya  
abuy wadah di ya tapottapol.  
Ya wada nan Espiritun Apu  
Dios an umat hi dibdib  
nah tap-on di danum.



Ya kimmalih Apu Dios an kananay “Mawaday pat-al.”  
Ya pimmat-al. ot nan pat-al ya nginadananah mapat-al  
ya nan tapol ya nginadananah hilong. Ot mala-uh  
diyen hilong ot mabigat ya hidiyey namangulun algo.




Kanan bon Apu Dios di “Mawaday mangodwa nah danum ta wadah nuntap-o ya wadah nundaul.” Ya athidiy naat. Hanan wadad tap-o ya hidiye nadan kulabut an kalpuwan di udan ya nan wadad da-ul ya nan danum tuwali tuh luta. Hanan nuntap-o ya nginadanan Apu Dios hi kabunyan. Nahilong bon diye ot mabigat ot hidiyey mikadwan algo.



Ya kanan Apu Dios di “Amungok nan danum ta maappil ta matiboy luta.” Ya athidiy naat. Ot nan mamaga ya nginadananah luta ya nan naamung an danum ya nginadananah baybay. Ya hidiyen lintun Apu Dios ya maphod.



Kimballi boh Apu Dios an kananay “Tummol tuh lutan  
am-in di nunhihinnatkon an mitanom ya kakaiw an  
bumungan waday buwana ta nanongnan  
waday athidin mitanom.”



Ya nawadan am-in. Ya maphod dadiyen  
lintun Apu Dios. Ot mahilong bo ot  
mabigat ya hidiyey mikatlun algo.



Lintunay duwan o-ongal an pumat-al. Hanan algo an  
mamat-al tuh luta nah mapat-al ya nan  
bulan an mamat-al tuh luta nah  
hiling.




Ya athidi bon winadana nadan dakol an  
bittuwon. Nahilong bo ot mabigat ya  
hidiyey mikap-at an algo.




Kanan bon Apu Dios di  
“Mawadan am-in di  
nunhihinnatkon an  
matagun mihaad hi  
danum ya mapnuy  
kabunyan hi  
nunhihinnatkon an  
muntayyapan.” Nahilong  
bon diye ot mabigat ya  
hidiyey mikaliman algo.




Kanan bon Apu Dios di “Mawada tuh lutan am-in di nunhihinnatkon an aggayam, mailom ya adi. Ya mawada day mundallanan, nadan mungkaddapan ya nadan mumbulluhan.” Ya nawada da. Ya maphod dadiyen lintun Apu Dios.



Ya kanan bon Apu Dios di “Ad uwani ya lutuwon taku moy tagu an umat ke ditaku ta pun-ap-apun am-in nadan mumbibiyag tuh luta, kabunyan ya baybay.” Ya maphod am-in dadiyen lintun Apu Dios. Nahilong kediye ot mabigat ya hidiyey mikan-om an algo.




Hi APU DIOS ya inha-ad na nan lintunan tagu hidid Eden ta hiyay mumpaptok hidi.




Kanan APU DIOS ke  
hiyay “Am-in di bungan  
tudan kaiw ya  
damanan kanom, mu  
ammuna nan ohan  
kaiw an adim kanon di  
bungana. Hidiye nan  
mangidat hi laing an  
manginilah maphod ya  
gaga-iho. Te deket  
kanom hidiye ya mate  
ka.”



Hi APU DIOS ya lintuna tuwalin am-in nadan aggayam ya hahamuti an lutay nakapyaan da. Dadiyen lintuna ya ena impatibo nah lalaki ta ngadanana dida ot nan nungngadanah hin-oh-an dida ya hidiyey nunnanong an ngadan da. Mu maid ke dadiyey daydayunan pun-ibbanan bumaddang ke hiya.



Ot hay inat APU DIOS ya  
impahuyop na nan lalaki  
ot kaanonay ohan gunit  
nah taglang na ot ahina  
punduttumon nan laman.  
Kinapyanah diyen gunit  
hi babai ot iena nah  
kad-an nan lalaki.



Hituwey gapunan deket malahin di  
lalaki ya tayanana da inanan amana ta  
miaddum nah babai ta kay da oha.



Hi Apu  
Dios ya ongal  
di naminhod nan  
ditakun tatagu tuh luta, kinali uggena  
kinawwanan nan binugtung an  
Imbabalena, ot itud-ak na tuh luta ta  
am-in day mangulug ke hiya ya adida  
makastigun adida mihi-an ke Apu  
Dios, mu midatan dah biyag  
an maid di poppog  
na.



Roma 3:23 Am-in taku ya naliwat takun Apu Dios, ta hidiye nan makakuddang di kaphod takuh panibona.

Roma 6:23 Hay pumbalinan di liwat ya kate an hidiye nan kakastigu ta mihi-an tan Apu Dios. Mu hay idat Apu Dios nadah mangulug ke Apu takun hi Jesu Kristo ya hay biyagan maid di poppog na.

Hebrews 9:27 Am-in di tagu ya mahapul an mate, ne ahi nuppe hinumalyan Apu Dios.

Ephesus 2:8,9 Inihwang ditakun Apu Dios handih nangulugan taku gapuh namahig an ulena. Te ditaku ya maid di kabaelan takun mangihwang hi adol taku. Hay kihwangan taku ya malpun Apu Dios ya abu, bokon gapuh maphod an pangi-e. Kinali adinadaman ipahhiya takuy mipanggep ketuwe.



Roma 10:9,10 Deket kalyon takun hi Jesus di Ap-apu ya deket nahamad di pangulug takun minahuwan Apu Dios hiya ya mihwang taku.

Te hay kihwangan di tagu ya mipuun hi pangidinolanan Jesu Kristo, te nan tagun mangulug ke hiya ya ipainila nay nangulugana ya hiyay tobalon Apu Dios an maphod. Hidiyen tagu ya mihwang.

Juan 3:16,17 Hi Apu Dios ya ongal di naminhod nan ditakun tatagu tuh luta, kinali uggena kinawwanan nan binugtung an Imbabalena, ot itud-ak na tuh luta ta am-in day mangulug ke hiya ya adida makastigun adida mihi-an ke Apu Dios, mu midatan dah biyag an maid di poppog na. Ugge intud-ak Apu Dios nan Imbabalena tuh luta an e mangastiguh tatagu, mu intud-ak nan mangihwang ke dida.



1 Juan 5:11-13 Athituy kinalin Apu Dios: Indatan ditakuh biyag an maid di poppog na ya hituwen biyag ya malpun Jesu Kristo an Imbabalena.

Kinali am-in nadan mangulug nah Imbabalen Apu Dios ya wadan didah diyen biyag an maid di poppog na. Mu nada ken adi mangulug nah Imbabalena ya maid hidiyen biyag ke dida.

Hituwe ya intudok kut dakayun mangulug nah Imbabalen Apu Dios ya inilaon yun waday biyag yun munnananong ta nangamung.



# Genesis 1-2

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: Bob Davies; Tammy S.

Ifugao, Tuwali Bible (ifk) © 2004, Wycliffe Bible Translators,  
Inc. All rights reserved.

<https://www.bible.com/bible/2123/GEN.1.IFKWB>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

